

Jka-isa a Sulat'i Yuhan

Bismillah Sir-Rahman Nir-Raheem

Assalamu Alaikum Warahmatullahi Ta'ala Wabarakatuh

Na nia sinemulat kanu nia a kitab na su mama a bedtuan sa Yuhan a wata ni Zabidi. Pinadtaya sekanin nu Isa al-Masih enggu isa bun sekanin kanu napamili nu Isa al-Masih a makaunut lun kanu langun nu galebekan nin. Na su kinasulat'in sa nia na lu sekanin natabu sa kanu dalepa a Ipisu kanu manga nempulu lagun ulian nu kinapambibiag 'bpaluman kanu Isa al-Masih. Na su dalepa a Ipisu na sakup'u Turkey sa saguna a timpu.

Nia kahanda ni Yuhan kanu kinasulat'in kanu ika-isa a sulat'in na asal'a kapamapatan nin su manga taw pantag kanu 'bpamamandu a di pakasugat ka papedsibayn nilan su manga taw a 'bpamaginugut kanu Kadenan. Ibpamandu bun ni Yuhan kanu nia a kitab su kagkakalimua nu uman i isa. Papedsabutan nin bun kanu nia i apia entain i malusud kanu Isa al-Masih na makatalima kanu uyag-uyag a da taman nin.

Su Kinapayag kanu Kadtalu

1 ¹Nia su sulat ku sa lekanu pantag kanu Kadtalu a 'gkabpunan nu uyag-uyag a da taman nin. San den sekanin iganat pan sa ganatan. Nakineg'ami enggu nailay demun nu dua embala a mata nami taman sa naami nami sekanin. ²Na su uyag-uyag a nia a da taman nin na nakapayag den enggu nailay nami den. Na ibpangimbenal'ami enggu ipebpayag'ami sa lekanu su uyag-uyag a nia a da taman nin a lu den kanu Ama unan pan nu kinapangaden enggu inipayag den sa lekami. ³Na ipebpayag'ami sa lekanu su ngin i nailay nami enggu nakineg'ami ka asal'a makaamung kanu bun kanu kabpagisa-isa nami a su kabpagisa-isa sia kanu Ama enggu kanu Tunggal'in^a a su Isa al-Masih. ⁴Na inisulat'ami i nia sa lekanu ka enggu matalutup su kagalaw tanu.

**Su Taw a 'Bpelalakaw kanu Maliwanag
enggu su Taw a 'Bpelalakaw kanu Kalibutengan**

⁵Na nia su nakineg'ami a kadtalu nu Isa al-Masih a ipebpayag'ami sa lekanu: Su Kadenan na sigay enggu dala sa lekanin su kalibutengan. ⁶Na pakandalebut tanu amaika edtalun tanu i 'bpagisa-isa tanu kanu Kadenan inunta na nia tanu 'bpelalakawan na su kalibutengan enggu dikena tanu 'bpaguyag-uyag sa bantang. ⁷Ugaid'a maaden sa lekitanu su kapagisa-isa amaika sia tanu 'bpelalakaw kanu maliwanag a mana su sekanin a entu a lu sa lekanin su sigay taman sa su langun nu kabaladusan tanu na mapunas sia makanggulalan kanu kinatuga nu lugu nu Tunggal'in a su Isa al-Masih.

⁸Na amaika edtalun tanu i dala kabaladusan tanu na pedsalimbuten tanu su ginawa tanu enggu dala sa lekitanu su bantang. ⁹Ugaid'a amaika taliman tanu i mimbaladusa tanu na su Kadenan a matidtu enggu kasaligan na ampunen nin su kabaladusan tanu taman sa su langun na kadaluakan a galebekan tanu na punasen nin den. ¹⁰Amaika edtalun tanu menem i dala tanu makandusa na papendalebuten tanu su Kadenan enggu su kadtalu nin na dala makatagu kanu pamusungan tanu.

^a **1:3 Tunggal'in** Nia sabap a kinagelal kanu Isa al-Masih sa Tunggal'u Kadenan na kagina ebpun demun sekanin kanu Kadenan sia nakanggulalan kanu Suti a Ruh nu Kadenan. Madakel pan i kasabutan tanu makapantag kanu Tunggal'u Kadenan sia kanu *Maena nu Mangadalem a Kadtalu kanu Kitab* a mailay kanu kapupusan nu nia a Kitab.

1 Yuhan 2

2 ¹Manga dua na wata, inisulat ku i nia sa lekanu asal'a di kanu embaladusa. Na amaika menem ka makandusa tanu na nia mamagelet sa lekitanu sia kanu Ama na su Isa al-Masih a ikelas. ²Ka sekanin i nabaluy a kurban u panun i kaampun kanu kabaladusan tanu. Dikena bu lekitanu a kabaladusan ka apia su kabaladusan nu sakadunia.

³Na nia amadan sa katawan tanu su Kadenan na amaika ipenggulalan tanu su manga kasuguan nin. ⁴Na pakandalebute su pedtalu sa katawan nin kun su Kadenan inunta na di nin ipenggulalan su kasuguan nin. Dala sa lekanin su bantang. ⁵Ugaid'a apia entain menem i 'bpaginugut kanu kadtalu nu Kadenan na saben-sabenal a natalutup den su limu nin kanu Kadenan. Na kanu maya ba a ukit na katawan tanu i lusud tanu sa lekanin. ⁶Na su pedtalu sa lusud sekanin kanu Kadenan na dait a maguyag-uyag sekanin sa mana su kinapaguyag-uyag'u Isa al-Masih.

⁷Manga lusud ku sa tian a papedtayan, na dikena man bagu a kasuguan i inisulat ku a nia sa lekanu ka andang den a san sa lekanu enggu nia bun ba su panduan a nangakineg'u den. ⁸Ugaid'a madtalu bu a bagu a kasuguan su nia kagina 'gkadadag den su malibuteng enggu pakatayaw den su maliwanag. Kagina nia nin man kabantangan na nailay den man su entu a kasuguan sia kanu kinapaguyag-uyag'u Isa al-Masih enggu 'gkailay bun i entu sia kanu kabpaguyag-uyag'u.

⁹Na apia entain i edtalu sa lusud sekanin kanu maliwanag inunta na 'gkabensian nin su suled'in na lu pamun sekanin nalusud kanu kalibutengan. ¹⁰Na apia entain i ipegkalimu nin su suled'in na sia 'bpaguyag-uyag kanu maliwanag enggu dala sa lekanin su 'gkadsabapan na kambaladusa. ¹¹Ugaid'a apia entain menem i 'gkabensi kanu suled'in na sia sekanin malusud kanu kalibutengan enggu entu bun ba i 'bpelalakawan nin. Di nin katawan u endaw sekanin pebpawang kagina pinisek sekanin nu kalibutengan.

Di Kalilini kanu Dunia

¹²Pedsulatan ku sekanu manga dua na wata, kagina inampun den su manga kabaladusan nu sabap kanu Isa al-Masih.

¹³Pedsulatan ku sekanu a manga ama kagina katawan nu den su sekanin a iganat pan sa ganatan na san den.

Pedsulatan ku sekanu a manganguda kagina tinabanan nu den su Datu na Giadsal.

1 Yuhan 2

14 Pedsulatan ku sekanu manga dua na wata,
kagina katawan nu den su Ama.

Pedsulatan ku sekanu a manga ama kagina katawan nu
den su sekanin a iganat pan sa ganatan na san den.

Pedsulatan ku sekanu a manganguda kagina mabagel i
salig'u enggu lalayun sa lekanu su kadtalu nu Kadenan
taman sa tinabanan nu den su Datu na Giadsal.

15 Na di nu kalilini su dunia atawa ka su apia ngin a nakadalem
lun, ka apia entain i malilini kanu dunia na di nin ipegkalimu su Ama.

16 Kagina su langun na nakadalem sa dunia a mana su mawag a kiug'u
ginawa enggu su 'gkailay nu mata a 'gkadsagikel'u ginawa taman kanu
kabpemasela sabap kanu ngin i aden kanu taw, na dikena i entu
ebpun kanu Ama ka ebpun i entu kanu dunia. 17 Su dunia enggu su
langun nu entu a nakadalem lun a 'gkadsagikel'u ginawa na 'gkadadag
bun su entu ugaid'a su penggalebek kanu kahanda nu Kadenan na
maguyag-uyag sa da taman nin.

Su 'Bpamedsungkang kanu Isa al-Masih

18 Manga dua na wata, nia den ba man su manga mauli a gay!
Nakineg'u bun i pakauma su taw a pedsungkang kanu Masih.^b Ugaid'a
apia man saguna na madakel den a penggemaw a 'bpamedsungkang
kanu Isa al-Masih. Tembu ba 'gkatawan tanu i nia den ba su manga
mauli a gay. 19 Na apia nadtagapeda tanu den su nia a manga taw kanu
paganay na dikena silan lusud sa lekitanu. Kagina amaika lusud silan
sa lekitanu na tatap tanu silan madtagapeda. Ugaid'a minawa
silan sia sa lekitanu asal'a makapailay nu Kadenan i saben-sabenal a
langun nilan na dikena lusud sa lekitanu.

20 Ugaid'a sekanu, na san den sa lekanu su kapegkagaga nu Ruh a
ebpun kanu kaisa-isa nin a Suti a su Isa al-Masih taman sa katawan nu
den langun su bantang. 21 Dikena nia ku kapedsulat sa lekanu i di nu
katawan su bantang ka katawan nu bun su entu enggu katawan nu bun

^b 2:18 Su taw a pedsungkang kanu Masih na pembuat kanu mauli den a timpu enggu sekanin
su taw a pedsakutu sa edtalun nin i sekanin kun su Kadenan. Dikena nia su Datu na Giadsal
ugaid'a aden bagel'in a inggay lun nu Datu na Giadsal asal'a makapagakal kanu manga taw.
Mailay i nia sia kanu Ikadua a Sulat kanu Manga Taw sa Tisalunika 2 ayat 3 taman sa 10 sia
kanu Kitab Injil.

1 Yuhan 2, 3

i dala man kabudtud a ebpun kanu bantang. ²²Na entain ba i budtuden, dikena ba su manga taw a ipegkias'in i su Isa na su Masih?^c Silan ba a entu su manga taw a 'bpamedsungkang kanu Isa al-Masih kagina ipegkias'ilan su Ama enggu su Tunggal'in. ²³Na apia entain i pegkias kanu Tunggal'in na da malusud kanu Ama. Ugaid'a apia entain menem i ipebpayag'in i 'bpaginugutan nin i su Isa al-Masih na Tunggal'u Kadenan na nalusud sekanin kanu Ama. ²⁴Na sekanu na palalayun nu kanu atay nu su langun na nangakineg'u kanu nangauna pan a timpu. Ka amaika mapalalayun sa lekanu su entu na mapalalayun kanu bun mambu kanu Tunggal enggu kanu Ama. ²⁵Ka nia man i inibpasad'u Isa al-Masih sa lekitanu na su uyag-uyag a da taman nin.

²⁶Na ipedsulat ku sa lekanu su makapantag kanu manga taw a papedsibay sa lekanu. ²⁷Ugaid'a sekanu, na san den sa lekanu su kapegkagaga nu Suti a Ruh a pinalangkap'u Isa al-Masih tembu di nu den nasisita su apia entain a mamandu pan sa lekanu. Ka su kapegkagaga nu Suti a Ruh i 'bpamandu sa lekanu kanu langun-langun enggu benal su ibpamandu nin, dala kalebut'in. Na kagina ka maitu na palalayun kanu kanu Isa al-Masih a mana bun su inipamandu nu Ruh sa lekanu.

²⁸Na saguna manga dua na wata, na palalayun kanu sa lekanin ka enggu sia kanu kauma nin na di tanu kagilekan mangadap sa lekanin taman sa di tanu lun kayan. ²⁹Na amaika katawan nu i ikelas sekanin na dait a katawan nu bun i natatalanged i apia entain i penggula sa kaikelasan na nabaluy den a wata nu Kadenan.

Su Bedtuan sa manga Wata nu Kadenan enggu su Kagkakalimua

3 ¹Ilay nu u ngin i kasela nu limu a inenggay nu Ama sa lekitanu! Initimbang tanu nin sa wata nin, na saguna na benal a nabaluy tanu den a manga wata nu Kadenan. Tembu nia ba i sabapan sa di tanu 'gkakilala nu dunia ka di nilan katawan su Kadenan. ²Manga lusud

^c 2:22 **Masih** Su kadtalu a Masih sa basa a Hibru na *mashiach* a nia nin maena na *binubusan sa lana* kagina sia kanu adat-betad'u manga Yahudi na su 'gkapamily nu Kadenan a endatu, mangurban atawa ka nabi na pembubusan sa lana su ulu nin sa tanda a pedsanganan sa bagel. Na su Isa na ginelalan nu Kadenan sa Masih kagina sekanin su napamily a nasanganan sa kapamelipuas kanu manga taw sa kanu kabaladusan nilan ka enggu di den silan masiksa. Na nia ba i 'bpagingapan nu manga taw a Yahudi a makapalipuas kanilan a mana su naalung sia kanu Kitab Taurat enggu sia kanu Kitab a Inisulat'u Manga Nabi. Madakel pan i kasabutan tanu makapantag kanu Masih sia kanu *Maena nu Mangadalem a Kadtalu kanu Kitab* a mailay kanu kapupusan nu nia a Kitab.

1 Yuhan 3

ku sa tian a papedtayan, saguna na nabaluy tanu den a manga wata nu Kadenan, na di tanu pan katawan u ngin i kadtandangan tanu kanu mangauma a gay ugaid'a katawan tanu i amaika makapayag den 'bpaluman su Isa al-Masih na makailing tanu kanu ngin i aden sa lekanin kagina mailay tanu den sekanin sa matakapala. ³Na apia entain i aden maya ba i inam'in sia kanu Isa al-Masih na itangka nin i ginawa nin kanu apia ngin a makambudseng sa lekanin kagina su Isa al-Masih na suti.

⁴Na apia entain iunggula sa kabaladusan na pedsungkang kanu pangitaban kagina su kapembaladusa na kapedsungkang i entu kanu pangitaban. ⁵Na katawan nu i nia kinasia nu Isa al-Masih na ibpagawa nin su kabaladusan. Na sekanin na dala man a benal dusa nin. ⁶Tembu apia entain i malalayun sa lekanin na di pembaladusa enggu apia entain menem i pembaladusa na da nin kilala su Isa al-Masih enggu da nin tuntayi u entain sekanin.

⁷Manga dua na wata, da kanu mapapagakal kanu apia entain. Ka su penggalebek man sa kaikelasan na ikelas sekanin a mana su kaikelas'u Isa al-Masih. ⁸Na apia entain menem iunggula sa kabaladusan na luyud kanu Datu na Giadsal kagina su Datu na Giadsal na iganat sa ganatan na pembaladusa den. Na nia man sabapan a kinasia nu Tunggal'u Kadenan na asal'a mabinasa nin su langun na galebekan nu Datu na Giadsal. ⁹Na apia entain i nabaluy a wata nu Kadenan na di den enggula sa kabaladusan kagina lu den sa lekanin su uyag-uyag a ebpun kanu Kadenan. Na kagina ka wata den sekanin nu Kadenan na di nin den makapapanalus su kanggalebek'in sa kabaladusan. ¹⁰Na sia tanu ba mailay u entain i manga wata nu Kadenan enggu entain i manga wata nu Datu na Giadsal: Na apia entain i di penggalebek sa kaikelasan enggu di nin ipegkalimu su suled'in na dikena wata nu Kadenan.

¹¹Nia man tutuma a nangakineg'u den paganay na dait a 'gkakalimua tanu. ¹²Di tanu ilingan si Kabil a taw nu Datu na Giadsal ka binunu nin su suled'in. Ngintu guna ka inimatayan ni Kabil su suled'in? Kagina si Kabil na mawag i galebek'in enggu su suled'in menem na ikelas i galebek'in. ¹³Tembu ba da kanu 'gkangagaip manga dua na suled amaika kabensian kanu nu dunia. ¹⁴Na sabap kanu kapegkalimu tanu kanu manga suled tanu na katawan tanu i nalepas tanu den kanu kapatay taman sa naaden den sa lekitanu su uyag-uyag a da taman

nin. Na apia entain i di mangalimuan na da pan malepas kanu kapatay. ¹⁵ Apia entain i 'gkabensian nin su suled'in na talibunu. Na katawan nu bun i dala kanu talibunu su uyag-uyag a da taman nin.

¹⁶ Sia tanu ba katawan su tidtu-tidtu a limu sa su Isa al-Masih na iningihad'in su umul'in sabap sa lekitanu. Na maitu tanu bun ba, dait a inggihad tanu su ginawa tanu sabap kanu manga suled tanu.

¹⁷ Na amaika su taw a aden kaaden nin ka 'gkailay nin den su suled'in a pakanasisita ugaid'a da nin edtabangi, na panun ba i kapedtalu nin sa lu sa lekanin su limu nu Kadenan?

¹⁸ Manga dua na wata, di tanu mangalimuan sa kadtalu bu atawa ka bitiala bu ugaid'a nia tanu kapangalimuan na inggulalan tanu sa senep sa atay. ¹⁹ Na amaika enggulan tanu i entu na matatalanged tanu i lusud tanu kanu bantang^d enggu sia kanu adapan nu Kadenan na makalilintad pan su ginawa tanu ²⁰ apia aden manga geda-geda nu atay tanu. Kagina labi a mabagel su Kadenan kumin kanu manga geda-geda nu atay tanu enggu katawan nin su langun-langun. ²¹ Manga lusud ku sa tian a papedtayan, amaika da geda-geda nu atay tanu, na di tanu kagilekan sa kanu kapangadap tanu kanu Kadenan. ²² Na apia ngin i pangenin tanu sa lekanin na inggay nin sa lekitanu kagina 'bpaginugutan tanu su kasuguan nin enggu penggalebeken tanu su ngin i pakasuat sa lekanin. ²³ Nia kasuguan nu Kadenan na su kasalig sia kanu ingala nu Tunggal'in a su Isa al-Masih enggu su kagkakalimua a mana bun su inisugu nin sa lekitanu. ²⁴ Na apia entain i 'bpaginugut kanu kasuguan nu Kadenan na lusud sekanin kanu Kadenan taman sa tapiden sekanin nu Kadenan. Na nia ukit a katawan tanu i pedtapiden tanu nu Kadenan na sia kanu kapalalayun nin sa lekitanu kanu Suti a Ruh.

**Su Taw a Lusud kanu Kadenan enggu su Taw
a dikena Lusud kanu Kadenan**

4 ¹ Manga lusud ku sa tian a papedtayan, da kanu babaya maginugut kanu apia entain a edtalu sa lekanu sa lu sa lekanin su Suti a Ruh ugaid'a edsipati nu muna su pedtalun nin u ngintu, saben-sabenal a aden sa lekanin su Ruh nu Kadenan. Kagina saguna na madakel den i

^d 3:19 Su lusud tanu kanu bantang na nia nin maena na sia lusud kanu Kadenan. Na su maitu ba a taw na ipenggulalan nin su kasuguan nu Kadenan asal'a matuman su kahanda nin.

1 Yuhan 4

pembubuat a 'bpenabi-nabi sia sa dunia. ²Nia ukit sa kataw tanu kanu taw a lu sa lekanin su Ruh nu Kadenan na amaika ibpangimbenal'in i su Isa al-Masih na mimbaluy a manusia na su entu ba a taw na lusud sekanin kanu Kadenan. ³Ugaid'a apia entain menem i di nin ibpangimbenal i mimbaluy a manusia su Isa al-Masih na dikena lusud kanu Kadenan. Lu sekanin nalusud kanu pedsungkang kanu Masih. Nakineg'u den i pakauma su pedsungkang^e a entu taman sa saguna a timpu na aden den 'bpamedsungkang kanu Isa al-Masih.

⁴Ugaid'a sekanu a manga dua na wata, na nalusud kanu den kanu Kadenan enggu tinabanan nu den su 'bpamedsungkang kagina su Kadenan a pedtapid sa lekanu na labi a mabagel kumin kanu Datu na Giadsal a sia sa dunia. ⁵Silan na napaulipen kanu dunia tembu ba nia nilan ibpamamandu na pantag kanu manga kaduduniay taman sa 'bpamakikinegen mambu silan nu dunia. ⁶Ugaid'a sekitanu na lusud tanu kanu Kadenan. Na apia entain i pegkilala kanu Kadenan na makikineg sa lekitanu. Ugaid'a apia entain menem i dikena lusud kanu Kadenan na di tanu nilan pakikinegen. Na kanu maya ba a ukit na katawan tanu u entain i taw a bantang i ibpamandu nin a ebpun kanu Ruh nu Kadenan enggu katawan tanu bun u entain i taw a dikena bantang i ibpamandu nin.

Su Kapegkalimu nu Kadenan enggu su Kapegkakalimua nu manga Taw a Lusud sa lekanin

⁷Manga lusud ku sa tian a papedtayan, 'gkakalimua tanu kagina su limu na ebpun kanu Kadenan. Na apia entain i 'bpangalimuan na nabaluy den a wata nu Kadenan enggu 'gkakilala nin den su Kadenan. ⁸Apia entain menem i di 'bpangalimuan na di nin 'gkakilala su Kadenan kagina su Kadenan na sekanin su limu. ⁹Inipayag'in su limu nin sa lekitanu sia kanu kinasugu nin kanu Tunggal'in sia sa dunia ka enggu tanu kaadenan na uyag-uyag a da taman nin sia makanggulalan kanu Tunggal'in. ¹⁰Nia man tidtu-tidtu a limu na dikena su kapegkalimu tanu kanu Kadenan ugaid'a su kapegkalimu nin sa lekitanu ka sinugu nin su Tunggal'in asal'a mabaluy a kurban a ukit a kaampun kanu kabaladusan

^e 4:3 su pedsungkang Nia bun ba su nalabit kanu Ikadua a Sulat kanu Manga Taw sa Tisalunika 2 ayat 3 taman sa 4 sia kanu Kitab Injil.

1 Yuhan 4, 5

tanu. ¹¹Manga lusud ku sa tian a papedtayan, na kagina ka maitu den i kinakalimu nu Kadenan sa lekitanu na dait a 'gkagalimua tanu bun. ¹²Da man nakailay kanu Kadenan ugaid'a amaika 'gkagalimua tanu na katawan tanu i pedtapiden tanu nu Kadenan enggu 'gkatalutup tanu su limu tanu sa lekanin.

¹³Na maya ba i ukit a katawan tanu i lusud tanu kanu Kadenan enggu pedtapiden tanu nin kagina pebpalayunen nin sa lekitanu su Suti a Ruh. ¹⁴Nailay nami enggu ibpangimbenal'ami i sinugu nu Ama su Tunggal'in asal'a makapalipuas'in su dunia. ¹⁵Na apia entain i ibpangimbenal'in i su Isa al-Masih na su Tunggal'u Kadenan na lusud sekanin kanu Kadenan taman sa tapiden nin sekanin. ¹⁶Na saben-sabenal a 'gkagedam tanu enggu pedsalig tanu kanu limu nu Kadenan sa lekitanu.

Su Kadenan na malimu, tembu apia entain i palalayunen nin su kapegkalimu nin na lusud sekanin kanu Kadenan taman sa tapiden nin sekanin. ¹⁷Na kanu maitu ba a ukit, na natalutup su limu tanu kanu ped tanu tembu di tanu enggeda-geda sia kanu kagkukum kanu Gay nu Harikiamat kagina apia sia tanu pan sa dunia na mana makapagidsan tanu den kanu Isa al-Masih. ¹⁸Dili man maaden i gilek kanu senep sa atay a talutup a kakalimu kagina su kagilek na aden lakit lambay nin sa kasiksan. Na apia entain i 'gkagilekan na dala sa lekanin su entu a talutup a limu.

¹⁹Na 'gkagalimua tanu kagina su Kadenan i muna-muna a nalimu sa lekitanu. ²⁰Na pakandalebut su apia entain a edtalun sa "Ipegkalimu ku su Kadenan" ugaid'a 'gkabensian nin su suled'in. Ka apia su suled'in a 'gkailay nin demun, ka di nin makakalimu, na nia nin pan a entu makakalimu su Kadenan a di nin 'gkailay? ²¹Nia ba man su kasuguan nu Kadenan sa lekitanu na apia entain i ikalimu nin su Kadenan na dait a ikalimu nin bun su suled'in.

5 ¹Na apia entain i 'bpaginugutan nin i su Isa na sekanin su Masih na su entu ba a taw na nabaluy den a wata nu Kadenan. Na apia entain i malimu kanu ama na malimu bun kanu wata nin. ²Amaika ipegkalimu tanu su Kadenan enggu ipenggulalan tanu su kasuguan nin na katawan tanu i pakakalimu tanu bun su nabaluy a manga wata nu Kadenan. ³Ka maitu ba i ukit a kapegkalimu kanu Kadenan amaika ipenggulalan tanu su kasuguan nin. Na dikena man malegen a

1 Yuhan 5

ipenggulalan su manga kasuguan nin ⁴kagina apia entain i nabaluy a wata nu Kadenan na tinabanan nin den su dunia. Na nia tanu kinataban kanu dunia na sabap kanu salig tanu. ⁵Na entain ba man i makagaga temaban kanu dunia, dikena ba su 'bpamaginugut sa su Isa al-Masih na su Tunggal'u Kadenan?

Su Pangimbenal pantag kanu Isa al-Masih

⁶Na su kinasia nu Isa al-Masih sa dunia na napasalawat sekanin sa ig enggu napatuga sa lugu. Na dikena bu sekanin matag sinalawatan sa ig sa amadan sa sekanin su Tunggal'u Kadenan ka apeg den su kinatuga nu lugu nin. Su Ruh nu Kadenan demun i 'bpangimbenal kanu entu ka su langun nu kadtalu nu Ruh nu Kadenan na bantang. ⁷⁻⁸Na su Ruh nu Kadenan enggu su ig apeg'u lugu na nia ba i 'bpangimbenal kanu Isa al-Masih. Isa bu i ibpangimbenal'ilan pantag sa lekanin. ⁹Na amaika pedtaliman tanu su kapangimbenal'u manusia, na labi a taliman tanu su kapangimbenal'u Kadenan. Na su entu a inipangimbenal'in na makapantag kanu Tunggal'in. ¹⁰Na apia entain i pedsalig kanu Tunggal'u Kadenan na naginugut kanu inipangimbenal a entu. Ugaid'a apia entain menem i di pedsalig sa entu na papendalebuten nin su Kadenan kagina di nin 'bpaginugutan su ibpangimbenal'u Kadenan pantag kanu Tunggal'in. ¹¹Na nia ba su inipangimbenal'in: Inenggay nu Kadenan sa lekitanu su uyag-uyag a da taman nin enggu su Tunggal'in i 'gkabpunan nu nia ba a uyag-uyag a da taman nin. ¹²Kagina ka maitu na apia entain i nalusud kanu Tunggal'u Kadenan na lu den sa lekanin su uyag-uyag a da taman nin. Ugaid'a apia entain menem i dala malusud kanu Tunggal'u Kadenan na dala lu sa lekanin su uyag-uyag a da taman nin.

Su Taw a Makatalima sa Uyag-uyag a Da Taman nin

¹³Na ipedsulat ku i nia sa lekanu a 'bpamedsalig kanu ingala nu Tunggal'u Kadenan asal'a 'gkataan nu i san den sa lekanu su uyag-uyag a da taman nin. ¹⁴Na nia makagkabagel kanu manggiginawa tanu sa kanu kapangadap tanu kanu Kadenan na u mangeni tanu sa apia ngin a sia luyud kanu kahanda nin na pakikinegen tanu nin. ¹⁵Na amaika katawan tanu i 'bpakikinegen tanu nin, na katawan tanu bun i apia ngin i pangenin tanu sa lekanin na inggay nin sa lekitanu. ¹⁶Na apia entain i makailay kanu suled'in a penggula sa kabaladusan a dikena bun

1 Yuhan 5

menem nia nin kabpawangan na kapatay^f na ipangeni-ngeni nin asal'a makambalingan sekanin kanu Kadenan. Na nia maena nu pedtalun ku a nia na su manga taw a pembaladusa sa dikena nia nin kabpawangan na kapatay. Kagina aden bun manga kabaladusan a nia nin kabpawangan na kapatay,^g na dikena ku i entu pedtalun sa lekanu sa ipangeni-ngeni nu su apia entain a enggalebek sa maitu ba. ¹⁷Ka benal man a langun na kadaluakan a galebek na kabaladusan ugaid'a aden kabaladusan a dikena bun nia nin kabpawangan na kapatay.

¹⁸Na katawan tanu i langun nu nabaluy a wata nu Kadenan na di nin den papanalusen su kanggalebek'in sa kabaladusan ka pedtiakapan silan nu Tunggal'u Kadenan taman sa di silan 'gkaleseb'u Datu na Giadsal.

¹⁹Katawan tanu i sia tanu nalusud kanu Kadenan, apia pendatuan pan nu Datu na Giadsal su sakadunia. ²⁰Katawan tanu i sinemia den su Tunggal'u Kadenan enggu inenggan tanu nin sa itungan asal'a makilala tanu su tidtu a Kadenan. Na lusud tanu kanu tidtu a Kadenan kagina nalusud tanu kanu Tunggal'in a su Isa al-Masih. Sekanin su tidtu a Kadenan enggu su uyag-uyag a da taman nin.

²¹Kagina ka maitu manga dua na wata, na tangkai nu su manga pegkakadenanen.

Wassalam

^f 5:16 **kabaladusan a dikena bun menem nia nin kabpawangan na kapatay** Dikena nia pembitalan sia i manaut a kabaladusan ka manaut pan sa masela na kabaladusan. Na nia kabaladusan a di 'bpawang sa kapatay na su kabaladusan nu 'bpamaginugut kanu Isa al-Masih. Kagina su 'bpamaginugut kanu Isa al-Masih na 'bpagampunen nu Kadenan su kabaladusan nilan taman sa semangul silan sa lekanin. Su kapatay sia na dikena su matakapala a kapatay ka su kanarakan ugaid'a su 'bpamaginugut na malepas silan kanu entu.

^g 5:16 **kabaladusan a nia nin kabpawangan na kapatay** Na nia ba su kabaladusan nu manga taw a pegkias kanu Isa al-Masih. Na kagina ka di silan 'bpamaginugut na di maampun su kabaladusan nilan taman sa makaidtug silan kanu naraka.